

Dūlhe kā Dost



dūlhe kā dost

The Friend of the Bridegroom

by Bakhtullah

[Ao, Khud Dekh Lo 7]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of Clker-Free-Vector-Images
<https://pixabay.com/images/id-297283/>; J. Kemp/R. Gunter
<https://freebibleimages.org/illustrations/lis-washing-feet/>; K.

Tuck 025-kt-cloud-backgrounds.jpg in https://media.freebibleimages.org/stories/FB_KT_Cloud_Backgrounds/.

Bible quotations are from UGV.

for enquiries or to request more copies:

askandanswer786@gmail.com

Fahrist

Ḳhudā se hī Sab Kuchh Miltā Hai	2
Merī Ḳhidmat Bas Taiyārī Hai	3
Dūlhe kā Dost	4
Wuh Barḥtā Jāe	7
Injīl, Yūhannā 3:22-30	8

Ek din Yahyā Nabī ke shāgird be-chainī se apne ustād ke pās āe. Kahne lage, “Ustād, jis ke bāre meñ āpne gawāhī dī ki wuh Masīh hai, wuh bhī logon ko baptismā de rahā hai. Ab sab log usī ke pās jā rahe haiñ.”

► *Jab Yahyā baptismā detā thā to wuh kyā kartā thā?*

Wuh unheñ pānī meñ ḍubo detā thā.

► *Baptisme kā kyā maqsad thā?*

Baptismā lene wālā is se taslīm kartā thā ki main gunāhgār hūñ. Ab se main bure khyālon aur kāmōñ se dūr rahkar āne wāle Masīh ke lie taiyār rahnā chāhtā hūñ.

► *Yahyā Nabī ke shāgird kyon itne pareshān haiñ?*
Zyādā log Īsā Masīh ke pās jā rahe haiñ. Yih kaisī bāt hai? Is kā kyā matlab hai? Kyā wuh

hamārā muqābalā karnā chāhtā hai? Kyā wuh hamārī ḳhidmat ḳhatm karnā chāhtā hai? Aur phir hamāre ustād kā kyā banegā?

Ḳhudā se hī Sab Kuchh Miltā Hai

- *Kyā Yahyā Nabī nārāz huā? Kyā wuh māyūs huā?*

Nahīn. Us ne baṛī halīmī se jawāb diyā: “Har ek ko sirf wuh kuchh miltā hai jo use āsmān se diyā jātā hai.”

Kitnā dīlchasp jawāb.

- *Yahyā Nabī kyā kahnā chāhtā hai?*

Sab kuchh Allāh Ta’ālā ke hāth se miltā hai. Wuhī sab kuchh detā hai. Phir mujhe be-chain hone kī kyā zarūrat hai.

- *Kyā Yahyā yih kahte hue ḳhush yā dukhī hai?*

Wuh ḳhush hai.

Ham bhī bahut mauqoñ par kahte haiñ ki ūpar wāle kī marzī.

- *Aksar auqāt jab ham yih kahte haiñ to kyā ham ḳhush yā dukhī hote haiñ?*

Aksar jab ham yih kahte haiñ to ʔhush nahĩn hote. Ham m̄yūs hote haiñ ki ʔhudā ne wuh hone nahĩn diyā jo ham chāhte haiñ. Kahne k̄a matlab hai, chalo, main̄ majbūr hūñ. ʔhush nahĩn hūñ magar kyā karūñ?

Lekin Yahyā m̄yūs nahĩn hai. Wuh kandhe uchkākar nahĩn kahtā ki chalo ʔhudā kī marzī. bilkul nahĩn. Wuh ʔhush hai.

Merī ʔhidmat Bas Taiyārī Hai

ʔhushī kī lahr Yahyā kī har bāt se chhalaktī hai: Mainne to kahā thā ki main̄ Masīh nahĩn hūñ. Mujhe to sirf us ke āge āge bhejā gayā hai. Main̄ sirf us kī rāh ko taiyār karne āyā hūñ. Jis tarah Yasāyāh Nabī ne peshgoī kī thī,

Registān meñ Rab kī rāh taiyār karo! Bayābān meñ hamāre ʔhudā k̄a rāstā sīdhā banāo. [...] Tab Allāh k̄a jalāl zāhir ho jāegā, aur tamām insān milkar use dekheñge. (Yasāyāh 43:3)

Merā bas ek hī kām hai: Is rāh ko taiyār karnā. Jab Ḳhudā kā jalāl Masīh meñ zāhir ho gayā hai to mujhe māyūs hone kī kyā zarūrat hai? Jo ḳhidmat mujhe dī gai hai wuh mukammal ho gayā hai. Mainne rāstā taiyār kar rakhā hai aur bas. Merī taraf se koī kamī nahīn rahī.

Masīh kā pairokār hameshā aisā hī sochegā. Asl ustād aur bādshāh wuhī hai. Merā kām bas us kī rāh kī taiyārī karnī hai. Asl kām wuhī kartā hai. Wuhī dilon ke qilon ko torkar apnā rāj qāym kartā hai. Ham insānon kā is meñ koī hāth nahīn hai.

Dūlhe kā Dost

Tab Yahyā Nabī ek chaunkā dene wālī misāl pesh kartā hai: Dūlhā hī dulhan se shādī kartā hai, aur dulhan usī kī hai. Dost to dost hī hai chāhe kitnā achchhā dost kyon na ho. Hāñ, dost zarūr dūlhe kī ḳhushī meñ sharīk hotā hai. Dūlhe kī āwāz sun sunkar us kī ḳhushī kī intahā nahīn hotī. Main bhī aisā hī dost hūn.

- *Dūlhe kī misāl se wuh kyā kahnā chāhtā hai?*

Wuh yih kahnā chāhtā hai ki Masīh dūlhā hai jabki main dūlhe kā dost hūn.

- *Dost se kyā murād hai?*

Us zamāne mein shādī kā pūrā intazām dūlhe ke qarībī doston ke hāth mein thā. Aksar do aise dost the. Un kī zimmedārī yih bhī thī ki dūlhe aur dulhan ko salāmatī se dūlhe ke ghar pahunchāen. Un kī bahut ahmiyat thī. To bhī wuh shādī kā markaz aur maqsad nahīn the balki dūlhā aur dulhan. Shādī khatm huī to dūlhe ke yih dost khāmoshī se chale jāte the.

- *Yahyā ke nazdīk dūlhā kaun hai?*

Dūlhā Īsā Masīh hai.

- *Is se wuh kyā kahnā chāhtā hai?*

Markazī bāt dūlhā hai. Main sirf us kā dost hūn jo shādī kī taiyāriyon mein lagā rahtā hūn. Mujhe to dulhan se shādī nahīn karnī hai. Merā bas yih farz hai ki shādī ke intazām

par dhyān dūn. Dūlhe kī āwāz sunkar hī merī ḵhushī kī intahā nahīn hotī. Aur shādī kī takmīl par merā kām bhī ḵhatm ho jāegā.

► *To phir dulhan kaun hai?*

Is ke lie hamēn thoṛī gahrāī meñ jāne kī zarūrat hai.

Nabiyoñ ne sadiyoñ pahle farmāyā thā ki ek masīhānā waqt āegā jab Ḵhudā apnī qaum ko yoñ qabūl karegā jis tarah dūlhā apnī dulhan ko. Yasāyāh us waqt ke bāre meñ farmātā hai,

Jis tarah dūlhā dulhan ke bāis ḵhushī manātā hai usī tarah terā Ḵhudā tere sabab se ḵhushī manāegā. (Yasāyāh 62:5)

Yahyā Nabī yih kah rahā hai ki ab yih waqt ā gayā hai. Al-Masīh ā gayā hai. Wuhī dūlhā hai. Aur us kī dulhan us kī qaum hai, wuh jo us par īmān rakhte haiñ. Masīh apnī qaum ko bulāne āyā hai, aur yih baṛī ḵhushī kī bāt

hai. Ab tak main dūlhe kī taiyāriyon mein lagā hūn kyunki main us kā dost hūn. Lekin intazām karwāne kā merā kām khatm hone wālā hai aur main baṛā khush hūn. Main kis tarah gham khā saktā hūn?

Wuh Baṛhtā Jāe

Tab Yahyā Nabī ek gahrī rūhānī haqīqat bayān kartā hai: Lāzim hai ki wuh baṛhtā jāe jabki main ghaṭtā jāūn.

► *Is se wuh kyā kahnā chāhtā hai?*

Ahm bāt Masīh hai. Merī kḥidmat us kī nisbat sifar hai. Jab wuh ā maujūd huā hai to merā kām khatm hone wālā hai. Us kī tārif ho. Bas yih bāt ahm hai ki use jalāl mile, wuhī baṛhtā jāe. Dūlhe ko dekh dekhkar merī kḥushī pūrī ho gai hai.

Ek bār Masīh ne farmāyā, “Jo awwal honā chāhtā hai wuh sab se ākhir mein āe aur sab kā kḥādim ho” (Marqus 9:35). Yahyā mein yahī

ḵhādimānā rūh thī. Wuh sab kī ḵhidmat karne ko taiyār thā. Bas, dūlhe ko ḵhush rakhnā hai. Kuchh dinoñ bād Yahyā Nabī shahīd huā.

► *Kyā us kī ḵhidmat be-fāydā thī?*

Bilkul nahīn. Jo kām use diyā gayā thā wuh mukammal huā thā. Masīh kī rāh taiyār hui thī. Dūlhā ā gayā thā.

Injīl, Yūhannā 3:22-30

Is ke bād Īsā apne shāgirdoñ ke sāth Yahūdiyā ke ilāqe meñ gayā. Wahāñ wuh kuchh der ke lie un ke sāth ṭhahrā aur logoñ ko baptismā dene lagā. Us waqt Yahyā bhī Shālem ke qarīb wāqe maqām Ainon meñ baptismā de rahā thā, kyonki wahāñ pānī bahut thā. Us jagah par log baptismā lene ke lie āte rahe. (Yahyā ko ab tak jail meñ nahīn ḍālā gayā thā.)

Ek din Yahyā ke shāgirdon kā kisī Yahūdī ke sāth mubāhasā chhiṛ gayā. Zer-e-ghaur mazmūn dīnī ghusl thā. Wuh Yahyā ke pās āe aur kahne lage, “Ustād, jis ādmī se āp kī Dariyā-e-Yardan ke pār mulāqāt huī aur jis ke bāre mein āpne gawāhī dī ki wuh Masīh hai, wuh bhī logoṅ ko baptismā de rahā hai. Ab sab log usī ke pās jā rahe haiṅ.”

Yahyā ne jawāb diyā, “Har ek ko sirf wuh kuchh miltā hai jo use āsmān se diyā jātā hai. Tum khud is ke gawāh ho ki mainne kahā, ‘Main Masīh nahīn hūn balki mujhe us ke āge āge bhejā gayā hai.’ Dūlhā hī dulhan se shādī kartā hai, aur dulhan usī kī hai. Us kā dost sirf sāth khaṛā hotā hai. Aur dūlhe kī āwāz sun sunkar dost kī khushī kī intahā nahīn hotī. Main bhī aisā hī dost hūn jis kī khushī pūrī ho gāi hai. Lāzim hai ki wuh baṛhtā jāe jabki main ghaṭtā jāūn.